

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 5/2010-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut.:

Nunat Avannarliit Killiit Siunnersuisoqatigiiffiata Islandip radio, RÚV, Kalaallit Nunaata Radiua, KNR Savalimmiullu radio, ÚF kaammattorpaat suleqatigiinnertik annertusaqqullugu nukittorsaqqullugulu, nunat pingasut akornanni sanilerisanit nutaarsiassanik ullutsinnilu pisunik aallakaatassianik amerlanerusunik aallakaatitsisoqarsinnaalersillugu. Assersuutigalugu tamanna pisinnaavoq sapaatip akunnikkaartumik qaammatikkaartumilluunniit nunanit allanit nutaarsiassatut suliarisimasat ilaasa aalajangersimasat atorpeqartarnissaannik isumaqatigiissuteqarnikkut. Malugeqquneqarpoq taamatut suleqatigiinnerit arlaannaannulluunniit aningaasartuuterpassuarnik kinguneqartariaqanngimmata, tamatumani aallakaatitassianik nammineq suliareriikkanik paarlaasseqatigiittarneq pineqassamat.

(Aallartitat siulittaasuat Josef Motzfeldt)

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISUTAA

Siunnersuutip aappassaaneerneqarnerni saqqummiunneqatoq

Suliarinninnermi Ataatsimiititaliaq ukuninnga inuttaqarpoq:

Harald Bianco, IA, siulittaasoq

Andreas Uldum, D, siulittaasup tullia

Debora Kleist, IA

Ruth Heilmann, S

Kristian Jeremiassen, S, Doris Jakobsenimut sinnisussaq, S

Siunnersuut UPA2011-imi marsip 8-ani siullermeerneqareermat ataatsimiititaliamit misissorneqarpoq.

Kaammattuutit aalajangersakkap imarisaa siunertaalu

Kaammattuut, Islandimiut radioata (RÚV), Kalaallit Nunaata radioata (KNR) kiisalu Savalimmiormiut radioata (ÚF) suleqatigiinnerulernissaat suleqatigiinnerisalu nukittorsaaviginissaat pillugu Savalimmiormiut, Islandimiut Kalaallillu naalakkersuisuinut

innersuussutaavoq. Nunani taakkunani ataqatigiilluarnerup nuna tamakkerlugu radiokkut- tv-kkullu aallakaatitassianik paarlaaqatigiittarnikkut nukittorsaaviginissaa siunertaavoq, taamaalilluni nunani taakkunani innuttaasut nunat eqqaamiorisatik pillugit ilisimasaqarnerulerniassammata.

Kaammattuut aningaasartuutunik annertuunik kinguneqartussaanngitsoq Nunat Avannarliit Killiit Siunnersuisoqatigiiffiata nalilerpaa, allaffissornikkummi aningaasartuutaanerusinnaasut radiokkut tv-kkullu aallakaatitassianik Nunat Avannarliit avataanni pisinermi aningaasartuutaasartut sipaarutiginerisigut illuatungilerneqassammata.

1. Suliap Inatsisartuni siullermeerneqarnera

Kaammattuut akuerineqassasoq Naalakkersuisut inassutigaa. KNR'p siunnersuummut ilassinnilluarnera Naalakkersuisut tunngavilersuuminni pingaartissimavaat. Kaammattuullu KNR'p 2010-imiit 2014-ip tungaanut periusissatut pilersaarutaanut ilassutaassasoq, tassani takuneqarsinnaavoq, KNR aallakaatitassiarisartakkaminik nunat allat inoqqaavisa aallakaatitsiviinut paarlaasseqatigiittarniarloq. Aammattaaq KNR nunat avannarliit tv-qarfiinik tv-kkut aallakaatitassianik paarlaasseqatigiittareerpoq.

Siunnersuutip aningaasartassaanut tunngatillugu Naalakkersuisut erseqqissaatigaat, aningaasartassai aningaasaliissutitut killissaliunneqartut iluini pissarsiarineqassasut aammalu, qanoq annertutigisumik paarlaasseqatigiittoqartassanersoq qanorlu tamanna aqqissuunneqassanersoq KNR'p aalajangiiffigissagaa.

Kaammattuut partiinit tunngaviusumik tapersorneqarpoq. Nunat Avannarliit Killiit akornanni suleqatigiinnerup ineriartortinneqarnissaata pingaaruteqassusia kaammattutillu nunat akornanni kulturikkut oqaluttuarisaanermi paaseqatigiinnerunissamut tunngaviliissasoq partiit oqaaseqartartuinit oqaatigineqarpoq. Aammattaaq Inatsisartunut ilaasortat arlaqartut oqaatigaat, kaammattuut aamma kalaallinut Islandimut Savalimmiunullu nuussimasut, nunaminni pissutsinut malinnaaniarnerannut pitsaasumik sunniuteqartussaasoq.

Inuit Ataqatigiit, Atassutip aamma Siumup kissaatigaat, kaammattuut ataatsimiititaliami suliarineqassasoq, taamaalilluni kaammattuutip aningaasanut tunngasortai itisiliiffigineqassammata. Demokratit Kattusseqatigiillu Partiiata siunnersuut nangaanartoqartinngilaat.

Ataatsimiititaliap siunnersuummik suliarinninnera

Kaammattuut ataatsimiititaliap tunngaviatigut pitsaasutut isigaa. Islandimiut radioat (RÚV), Kalaallit Nunaata radioa (KNR) Savalimmiormiullu radioat (ÚF) ullumikkut suleqatigiissinnaareersut aammalu radiokkut tv-kkullu aallakaatitassiaminnik paarlaasseqatigiissinnaareersut Ataatsimiititaliap oqaatigaa. Aammalu kaammattuut KNR'p 2010-imiit 2014-ip tungaanut periusissatut pilersaarutaanut naapertuuttoq.

Aammattaaq ataatsimiititaliamit oqaatigineqassaaq Naalakkersuisut ilisimatitsissut, kaammattuut KNR'p ilassilluaraa. Taamaattumik ataatsimiititaliap ilimagaa, KNR'p siulersuisui Naalakkersuisut

akissuteqaatissaata suliarineqarneranut peqataatinneqarsimassasut, tassunga ilanngullugu kaammattuutip KNR-imut aningaasatigut kingunerisinnaasai pillugit.

Kaammattuutip aningaasatigut kingunerisinnaasai pillugit ataatsimiititaliaq nalilersuiniarsimavoq. Tamatumani ataatsimiititaliap immikkut maluginiarsimavaa, kaammattuutip piviusunngortinneqarnera KNR-imut pitsaanngitsumik aningaasatigut qanoq kinguneqarsinnaanersoq. Nunat Avannarliit Killiit Siunnersuisoqatigiiffiata nammineerluni oqaatigaa, kaammattuut aningaasatigut annerusumik minnerusumilluunniit imminut matussusissasoq. Apeqqutalerporlu naatsorsuutigissallugu piviusorsioortuussanersoq, nunanit allaniit aallakaatitassianik pisinissaraluamut sipaarutaasut atorlugit nutserinermut aningaasartuutit akilerneqarsinnaanersut? Illua-tungaani KNR, tamatumuuna ilisimasaqarlunilu misilittagaqareersup oqaatigaa, kaammattuut ilassilluarini.

Qulaani isumaliutigineqartut tunngavigalugit amerlanerussuteqartut tassaasut Inuit Ataqtigiit Demokratillu isumaqarput, KNR'p kaammattuummik ilassinnilluarluni oqaaseqarnera assut pingaartinneqassasoq. Tassami KNR suliffeqarfittut, kaammattuummik tamatuminnga piviusunngortitsisuusussaammat.

Akerlianik ataatsimiititaliami ikinnerussuteqartut tassaasut Siumut naliliipput, kaammattuut KNR-imut aningaasatigut artukkiisinnaasoq, taamaattumillu kaammattuutip atuutsinneqalernissaa KNR-ip nunatsinni innutaasunik sullissineranut pitsaanngitsumik kinguneqaratarsinnaasoq.

Naggasiutigalugu ataatsimiititaliap isumaqatigiittup kaammattuutit sukumiisumik suliarineqartarnissaat Nunat Avannarliit Killiit Siunnersuisoqatigiiffianut kaammattuutigerusuppaat. Matumani nunanut ataasiakkaanut kaammattuutit aningaasatigut kingunerisinnaasaat immikkut eqqarsaatigineqarput. Maannakkutut aningaasaqarnikkut pissutsit itsillugit tamanna assut pingaaruteqarpoq, qinikkat aningaasatigut periarfissat killeqaqisut iluini pingaarnersiuniartillugit. Nunanut Avannarlernut Killernut attuumassutilinnut suliaq tusarniaassutigineqaqqaarsimagaluarpat tamanna Nunat Avannarliit Killiit Siunnersuisoqatigiiffiata kaammattuutit saqqummiusnaanut nukittorsaataassagaluarpat, Tamanna Nunat Avannarliit Killiit Siunnersuisoqatigiiffiata kaammattuutaanik piviusunngortitsiniarnerup ingerlanneqartarnerata sukumiinerusumik missorneqarnissaanut Nunat Avannarliit Killiit Siunnersuisoqatigiiffiani kalaallit aallartitaannut kaammattuutaali.

Ataatsimiititaliap inassuteqaatai

6. april 2011

UPA 2011/99

Tamanna tunngavigalugu amerlanerussuteqartut tassaasut Inuit Ataqatigiit Demokratillu siunnersuutip akuersissutigineqarnissaa inassutigaat.

Tamanna tunngavigalugu ikinnerussuteqartut tassaasut Siumut siunnersuutip itigartitsissutigineqarnissaa inassutigaat. -

Taamatut oqaaseqarluni isumaliutissiisummilu paasinninni naapertorlugu ataatsimiititaliap siunnersuut aappassaaniingassanngortippaa.

Harald Bianco
Siulittaasoq

Andreas Uldum
Siulittaasup tullia

Debora Kleist

Ruth Heilmann

Kristian Jeremiassen